

朝鮮群書大系續々第十輯

東文選三

朝鮮古書刊行會

東文選第三輯目錄

卷第四十六

啓

卷第四十七

狀

卷第四十八

狀

卷第四十九

露布

檄書

箴

銘

卷第五十

銘

頌

贊

卷第五十一

贊

卷第五十二

奏議

卷第五十三

奏議

卷第五十四

奏議

卷第五十五

奏議

卷第五十六

奏議

文

卷第五十七

書

東文選第三輯目錄

卷第五十八

書

卷第五十九

書

卷第六十

書

卷第六十一

書

卷第六十二

書

卷第六十三

書

卷第六十四

記

卷第六十五

記

已上

東文選第三輯

東文選卷之四十六

啓

上李學士啓

林椿

携家同隱。願從江海之遊。築室以居。尙乏茅茨之具。敢陳危懇。仰丐優容。竊以用捨行藏。仲尼獨稱於顏子。理進亂退。孟軻亦與於伯夷。惟隱顯之隨時。乃聖賢之同致。絕世違俗。則往而作山中宰。利物及時。則出而爲帝者師。苟或獨善其身。莫如不俟終日。故梅福變名於吳市。君平賣卜於成都。賀老隱廬山。自號四明狂客。子陵臥釣瀨。亦稱東漢故人。從古以還。遺風可想。伏念某。散材瓠落。野性迂疎。枕石漱流。久負平生之願。閉門面壁。已灰榮望之心。雖盛明之世。不可易遭。而去就之分。各有所適。故當坎而卽止。非刻意以爲高。少游之思。不過終乘於下澤。謝安之志。亦將必去於東山。繫湍水之前頭。接積城之西畔。碧峯邈迤兮。多衡山嵩岳之壯觀。蒼波縹緲兮。有洞庭彭蠡之奇形。得一荒墟。纔數畝地。因問居民而將買。規爲逸士之幽棲。丹崖百丈。青壁萬尋。宛似宋織之隱處。明月雙溪。清風八詠。依然沈約之高遊。眞寂寞之濱。具仁智之樂。幅巾短褐。

吾將歸老於其間。泛宅浮家。豈恨大平而不遇。於焉放志。無復有求。恭惟某官。至誠接物。清德鎮浮。聖主得賢臣。若巨魚縱於大壑。仁人在高位。以膏澤下於斯民。庇陰所加。孤寒有托。重念某。獲服掃除之役。久遊門館之間。潛潤而生。已作不枯之草。餘膏所燭。常分無盡之光。出處無殊。生成有望。顧一介書生之計。乏三間草堂之材。以今年某月日。欲於神崑寺山中。斫取棟梁榱椽之具。伏望閣下。俯閱愚衷。特紆尊旨。助結小庵。而爲托。乃令幽迹。以得安。閑眠深谷之雲。如依德宇。每飲清江之水。皆是恩波。

上按部學士啓

代人

跋山涉水。行經旅館之蕭條。吐氣成章。偶發眞人之警歎。口翻瀾而快讀。目割膜以聳觀。竊以道假辭而傳。述者明而作者聖。文以氣爲主。動於中而形於言。非抽黃對白以相誇。必含英咀華而後妙。歷觀前輩。能有幾人。子厚雄深。雖韓愈尙難爲敵。少陵高峭。使李白莫窺其藩。聖俞身窮而詩始工。潘郎髮白而吟益苦。賈島之病在於瘦。孟郊之語出於貧。至如以李賀孤峯絕岸之奇。施於廊廟則駭矣。雖張公輕縑素練之美。猶得江山之助焉。才難不其然乎。賢者足以與此。恭惟某官。潛聖人道。負王佐才。吞萬卷於胷中。掃千人於筆下。陳秘書之大節。忠類朱雲。孝類考叔。廉類儀休。吳武陵之高文。博如莊周。哀如屈原。明如賈誼。作搢紳之袖領。號邦國之著龜。留如晦以佐時。天子望中興之業。出張綱

而爲使。朝廷無南顧之憂。所臨有聲。自任以重。除人民之疾苦。挫州郡之豪強。擁蓋張旌。觀風察俗。碧山萬里。紫微九重。想謫仙之雅致。明月雙溪。清風八詠。多沈約之高遊。其於秋入郵亭。雲橫秦嶺。登高望遠。有滕王閣流水長天。選勝探奇。如石屏風孤煙落日。於是寄高情於物表。騁逸興於詩壇。懷古感今。舒賤點翰。爲文迅速。歛如下瀨之船。落筆縱橫。凜若倚天之劍。眞五經之鼓吹。作萬口之笙簧。壓倒曹劉。鞭笞屈宋。曲盡飄然之思。似非率爾而成。禹錫作詩。每有護持之神物。微之有詠。時多請購之蠻酋。傳之無窮。利者蓋寡。伏念某。間間小智。瑣瑣末流。謬登千佛之名。來赴三刀之夢。神明決事。雖素愧於陸雲。辛苦處身。亦庶幾於孔奮。比遭當世之貴流。繼作此方之膚使。事與心違。道不我合。安敢望其保護。常恐被於猜疑。適聞閣下之出巡。實是吾曹之大幸。固所願也。不亦樂乎。然而非鄙生入幕之賓。異元禮通家之舊。但始自於小名犬子。久從遊於佳壻鷄林。因竊謂絳帳先生。必不遺杏壇弟子。心自傾於向日。久懷葵藿之誠。飛不可以越階。祇守蚊虻之分。頗稽謁見。殊積悚兢。自知阮籍之禮疎。無乃謝安之性緩。側聞盛制。實激私心。強隨韻格之艱。以挾荒蕪之作。低頭拜東野。切有慕於高才。捧心效西施。敢輒忘於己醜。

賀王舍人啓

宸極疏恩。驟降紫泥之詔。掖垣進秩。更遊紅藥之階。除目播騰。士林增抃。竊以

惟內制之重職。實右省之峻班。讜議嘉謨。備諫諍七人之列。高文大冊。裁絲綸五色之書。在唐以馬周岑文本爲得人。至宋有楊億蘇子瞻之故事。繼茲前美。今有幾人。恭惟某官。學自名家。才鍾間氣。王茂弘贊中興之霸業。帝稱朕有蕭何。歐陽脩排諸子之異端。人曰。今之韓愈。早遇知於旦暮。備踐秩於清華。用之則行。慨然獨立。久協僉言之允。雅諧上簡之求。果被異恩。更升峻級。三進及雷。卑之無甚高論。一言興邦。聞者足以爲戒。賢旣大用。國其庶興。某頗忝品題。濫遊門館。幸獲聞於賞善。竊自喜於私誠。蟠木爲之先容。雖愧孤根之無用。大廈成而相賀。尙知巨陰之得依。

謝尙州鄭書記紹啓

樂郊寓迹。方謀容膝之安。公廩振貧。特助齊眉之餉。恩非望及。感與愧并。某祚薄門衰。身殘家破。徒欲求田而問舍。飄然去國以離鄉。久餬口於江南。幸卜居於境內。食如玉薪如桂。不堪蘇子之愁。樹之穀藝之麻。聊勉柳生之業。形羸色瘁。衣破履穿。萬卷書生。磊落枯腸之文字。數間茅屋。蕭條冷甑之塵埃。分自甘令伯之零丁。猶未免相如之傭賃。朝不謀夕。窶而且貧。鄉黨竊笑而相欺。朋遊皆背而告絕。至此亦命。予將疇依。豈圖長者之仁。俯記同門之賤。每於謁見。輒賜從容。愍孤迹之滯淹。語平生之契闊。綸巾論道。雖非入幕之賓。絳帳握衣。喜預授經之列。交則黷而意不倦。勢甚卑而禮有加。或開其翰墨之場。或導以田

園之樂。念腐儒疎於計活。而旅食無以支持。迺歎困窮。遂令矚瞻。布衣蔬食。晏如也。久希毛玠之風。肥馬輕裘共弊之。幸見仲由之義。霈其惠澤。及爾妻孥。一

代金善州瑗上晉陽林大判啓

一夫泣以向隅。滿堂爲之不樂。大人清而容物。惟所欲者必從。誠未忍於胷懷。敢冒塵於視聽。恭惟某官。天才秀逸。雅量宏深。張鷟文高。時皆號曰青錢。選元琳望重。人當知作黑頭公。主上喜於同時。朝廷倚以爲重。暫虛侍從之列。出蒞股肱之邦。早徙天池。搏而上者九萬里也。遠宣王化。共我理惟二千石乎。雅諧黃屋之心。大慰蒼生之望。伏念某庸虛末品。跣跣下才。竄謫江湖。久戀子牟之魏闕。遭逢旦暮。詔徵賈誼於長沙。舊里爲墟。生妻去室。及一麾而出守。乘匹馬以獨來。行道遲遲。窮愁鬱鬱。窻前列遠岫。豈尋謝守之居宴。寢凝清香。久欠蘇州之興。昨者來投巨鎮。忝預華筵。對孔融北海之樽。擁安石東山之妓。心乎愛矣。目而送之。醉花柳窮江山。行盡謫仙之樂事。曳羅縠蘊蘭麝。無非金谷之佳人。命以傾城。使之薦枕。方結綢繆之信。欲寬羈旅之愁。奈何事與心違。會難別易。黯銷魂於南浦。忽失佩於江臯。晚色慘兮愁容。秋風吹兮哀響。古國三千里。那堪遊子淚霑巾。巫山十二峰。正是行人腸斷處。想仙容之綽約。弔隻影以徘徊。其於旅館秋涼。郡齋夜靜。空輾轉而不寐。念聚散之難期。思子爲勞。願言則嚙。南有沉鱗北翳羽。嗟影響之無因。上窮碧落下黃泉。指生死而爲誓。必有與

也。求則得之。昔者杜牧聞紫雲之名。乃往乞於李相國。孫秀知綠珠之美。亦使求於石將軍。况吾戀戀之故人。肯拒拳拳之危懇。仰惟大度。俯諒愚衷。女子縫裳。俾助鰥夫之窮計。我心匪石。敢忘知己之厚恩。

答從兄啓

低頭拜東野。阻獲昌黎之從遊。打門驚周公。忽承諫議之寄信。伏念某。衰門冷裔。末路羈蹤。十載艱難。偶脫風波之地。一涯流落。久淹瘴癘之鄉。久積憂傷。頗乖榮衛。昨以負薪之疾。不堪伏枕之勞。惟君子之垂仁。記窮民而無弃。惠然肯顧。愍爾衰容。加以解賀監之金龜。換洞庭之春色。慰我弊廬之牢落。設其小飲之從容。舉白飛觴。客以清濁爲聖賢耳。揮毫落紙。兄之心肝皆錦繡耶。乃促膝而談。或持頤而笑。灑若沉痾之頓愈。美哉樂事之相并。白綸巾宮錦袍。盡淋漓於座上。明月盃清風簟。多交錯於松間。及乎日入虞淵。雲生楚岫。煙景晚色。渾爲慘淡之愁容。樽酒相逢。已作分離之餘恨。但貽書而致謝。承墮墨之繼臨。旨盡綢繆。言多款密。欣聞親戚之警欬。已覺精神之坐馳。

謝見訪啓

病莫能興。久臥窮閭而伏枕。蹙然而喜。忽驚長者之迂車。惟憂患之餘生。抱支離之多病。久矣朋遊之謝絕。何其門巷之蕭條。豈意仁人。不遺舊物。常裹飯而來問。或載酒以相過。共爲方外之遊。不道人間之事。守顏回之陋巷。雖簞瓢不

堪其憂。入王績之醉鄉。非轍迹所可得至。有文以接其樂也。融顧枯朽之孤骸。辱撫存之厚眷。其爲感悚。曷盡叙陳。

賀李狀元眉叟啓

文高學博。當今捨我其誰。選妙鑿精。得人於斯爲盛。凡其聞覩。莫不歡欣。恭惟狀元。負王佐才。號名家子。若高山深谷。龍虎變化。隱顯隨時。如孤峰絕岸。雲雷發興。文章駭俗。蠻夷欲購其篇什。草木亦知其聲名。趨升堂補闕之試。則諸生推而先登。應宏辭拔萃之科。則多士拱而圓視。何其壯也。孰敢當哉。是天上謫仙人。眞世間奇男子。况斯文已將墜地。而聖主急於取才。果應精求。首登優第。武帝讀相如之賦。喜於同時。明皇聞李白之才。召而親見。朝纔綴行於桂嶺。夕必待詔於玉堂。選士以來。唯公而已。曾吞雲夢者九箇。望素負於經綸。身到黃扉已四人。位竚登於廊廟。使文風而大振。爲儒者之極榮。某筆硯舊交。丘園遺老。路窮鵬海。阻攀羊角之搏。病臥蟻床。未展鳧趨之禮。

安西大判陳郎中光脩啓

黃鵠凌虛。雖有九霄之逸翮。白駒在谷。恨無一束之生芻。敢將長喙以哀鳴。庶或動心而垂察。伏念某。命賦多難。性鐘至愚。慕顏回賢人之樂。雖甘飲水曲肱。非元龍國士之心。徒欲求田問舍。昔吾先祖。遇聖初基。轉籌幄中。眞子房之人傑。圖形閣上。忝唐帝之功臣。乃貽鐵券之書。永有土田之錫。及傳後嗣。見奪他

人。遂令忠義之魂。久絕歲時之享。以茲興歎。每欲訟寃。然而孤拙之心。固易危而自縮。流離之迹。方遠退以深藏。尙口乃窮。多言可畏。故莫伸於鬱結。而坐受於飢寒。昨披悃愾之誠。仰叩高明之鑒。雖莫躬於造請。實有意於知憐。惟客乃公。勿拂所欲。希荊州半面之識。貴踰萬戶封侯。得劉弘一紙之書。賢於十部從事。然乏金張之爲援。尙稽虞芮之質成。聞循吏善政之風。其惟良二千石也。使遊民不耕而食。胡取禾三百困兮。不有仁人。孰噓冰民。恭惟某官。際天精識。命世賢才。李太白獨擅歌詞。人稱國手。陳子昂復興騷雅。世號文宗。天子喜於同時。廷臣莫能出右。謀猷告后。素勤伊尹之忠。臺閣生風。早振陳咸之節。厭嚴助承明之直。請張敞劇郡之行。果簡在於上心。而出鎮於西海。遠宣王化。大慰民心。加以挫豪強而自服。禮儒雅以旁延。士願品題。人皆樂慕。引此妄庸。益深敬仰。意在山水。庶逢鍾子之知音。皮有陽秋。未接褚裒之雅氣。伏望救人無弃。決事如神。遂令舊將之雲孫。獲食世封之尺地。一家飽暖。儻蒙濡沫之恩。萬死粉糜。敢誓漆身之報。

上李常侍知命啓

遊羿彀而不中。宜任分無慊於心。與越戰而或封。請聚謀以鬻其技。敢贊謬悠之浪說。仰希咳唾之餘音。竊以易牙之前。淄澠不能隱其味。師曠之側。鄭衛未嘗欺其聲。况大賢能精於選掄。而多士孰逃於鑿藻。故殷卿考第。先於詞學。而

必收。永叔試文。務爲險怪者皆黜。使文風淳而造理。彼退者舉無屈辭。然而雖權衡本出於至公。有愚智相雜而交進。王良爲馭造父驂乘。皆欲善試其良能。卞和泣玉。伯牙碎琴。固常罕遇於眞賞。一失其顧。無如之何。陳謁贄卷於權舍人。自伸就試之志。亞之上書於李諫議。未免混類之悲。茲皆當代之大才。況下古人於數等。伏念某。晚未聞道。朴不曉文。七歲誦六甲。雖無敏悟之才。三年通一經。頗有辛勤之學。焚膏以繼。下筆不休。恐長虞墮其家聲。望董子哀然舉首。謂閣下操升黜之柄。是小子得奮揚之秋。何相須殷相遇。疎願莫之遂。奈其進銳其退速。理固爲然。以獐頭鼠目之姿。角虎戰龍爭之地。多多益辦。始期必勝。以取之。一一以吹。乃復先逃而去矣。終身所恥。咋舌何言。雖十上忘勞。後必作青雲之上客。其一條遺恨。在不爲玉笋之門生。信通塞皆係於時。故功名數失於會。分甘藏縮。跂絕亨嘉。匠伯以爲不材。自慚無用。大人清而容物。豈弃所長。恭惟閣下。一角祥麟。九苞威鳳。幾千年出韓愈。振文章於已衰。五百歲得陳君。補風雅之久缺。潤色皇朝之制作。主張吾道之會盟。揚紫微垂虹蜺。風彩傾乎四海。光天衢樹桃李。英才萃於一門。凡見博帶褒衣之徒。必將分庭抗禮以待。重念某。窺牆尙阻。俸德益深。自吾叔伯之生平。頗獲師資於道義。願自稱文學之通家。後欲往俟以直前。得相見。雍陶之詩集。中亦何疑於未接。伏望和顏假色。大度包荒。少垂仁者之哀矜。俯記孤生之潦倒。千里附於驥尾。儻得依歸。一

死輕於鴻毛。誓圖報効。

賀張侍郎自牧

解職後拜大僕卿寶文閣直學士仍致仕啓

李奎報

右伏審澤霈層霄。春還暮景。聖明所以優老。耆舊莫不爲榮。竊惟有國已來爲臣之體。年甫滿七旬。則身雖解職。官不登三品。則祿未及家。故進而就列也。不辭夙夜從事之勞。及老而釋位也。未免朝夕奉己之患。孰於得謝居閑之際。致此崇資進秩之榮。嘉若異恩。始于大丈。恭惟學士閣下。襟期倜儻。器度汪涵。書是張芝之後身。文爲燕國之大手。夙登顯要。卓著聲稱。腰鞶帶也。已飾列卿之儀。掌棘闈也。已更座主之任。暨當退逸。反困食貧。昔日榮華。似罷邯鄲之一夢。餘生計活。翻爲顏巷之屢空。有識同嗟。無人不憫。然積其善者。慶不艾。種其德者。福所滋。果蒙牽復之名。忽擢高華之秩。奉車職緊。學士資清。實明公胡考之基。亦世嗣熾昌之兆。凡叨夙眷。盡罄欣悰。祿踰百鍾。豈高門之所獨慶耳。歲釀九醞。如吾輩者。亦與霑焉。抃躍之誠。述宣莫旣。

謝趙相國上筭子薦進啓

才非卓犖。過煩薦鶖之書。感至銘藏。空洒泣鮫之淚。竊以都宰相之位。揔朝廷之權。職所首行。莫推賢之爲急。人難膚識。在考實之惟精。知而不舉。則頗類妨能。舉而不實。則未免招謗。惟物論之歸允。合人心之取平。如某者。學靡該通。性

惟狂狷。早擢春官之第。不思宦路之難。初欲直前而進焉。便登坦道。漸如自後而擠者。反落窮坑。凡閱八年。未霑一命。琴爲無聞而絃絕。鳳髓莫連。劒因不試而塵生。鵝膏難瑩。時乎晚矣。命也何如。豈圖眷遇之非常。俯憫孤寒之寡援。曲收一介。仰達九重。苟被皇上曰可之音。卽關閣下專斷之手。吾事可必。不占亦知。公道如鈞衡。而雖出無私。人情豈木石而頑然自若。恩將及於鮒轍。命已輕於鴻毛。苟有此身。其忘曷日。

上晉康侯謝直翰林啓

紅綃禁署。素號仙官。白屋孤生。謬承寵典。竊思榮幸。蓋自甄鎔。伏念某。地寒門微。性介資褊。早年力學。蓋欲沐芳而彈冠。末路身窮。其如蒙垢而晦彩。已分泥蟠之困。絕圖水擊之心。豈無知音。列在顯位。自天水公。凡閱三相。始將提獎而未終。登禮部試。無慮十年。其處奇屯者。寢久。時之否也。世孰哀之。及賢侯汰國之初。補劇邑掌書之寄。緣愚暗未更於世狀。常抗直不屈於長官。果被巧讒。幾不自雪。不有仁明鏡察之智。孰分誣構錦萋之辭。俾齒平人。勿加重責。其不嬰罪咎也大幸。又安望爵級之斯躋。故屏迹而退藏。方杜門而自省。豈意令公閣下。恢弘大度。洗滌舊瑕。諒予孤拙而無他。意欲刮磨而試可。收驚魄於流涎之鰐口。霑滋澤於在轍之鮒鱗。過收無用之才。擢置代言之地。積年之屈。一旦方信。天地生我而未澤其身。父母卵我而未傳以翼。凡曰吾之喘息。一皆公所生。

成。噫閣下所以用僕者。期有以文章小技。展微効於朝家者也。某敢不理塞心之茅。修汲古之纆。研精礪業。粗潤色於皇謨。洗手奉公。免忝塵於明鑒。區區之蘊。吶吶難窮。

謝奇平章召赴禊宴啓

美景良辰。方肆流觴之飲。下官末客。猥蒙折簡之招。退省僭榮。不勝厚慙。恭惟相國閣下。身生紈綺。職摠衡鈞。將相兼資。極門闈之燠灼。風流藉甚。寓泉石之逍遙。侔衡霍而鑿出奇峰。蹙江淮而疏開方沼。彩鴨浮沉於碧浪。翠禽嚶唳於雕籠。若此游觀。未曾聞見。及乎九陽令節。三月上除。追鄭國之遺風。方修禊事。慕蘭亭之勝集。特召嘉賓。豈繫圭竇之蹤。得與錦筵之末。伏念某。跣跣之士。腐爛之儒。迺緣居近於芳隣。亦被許叅於高宴。間青林而鋪座。環流水以送杯。瑤箏錦瑟之哀彈。絃將手語。雲鬢月眉之絕豔。目與心期。輕風飄弄於舞衫。飛絮撲緣於歌扇。飲酣侵暮。倒載還家。醉夢方醒。忽若悞遊於仙府。宿醒未解。闕然阻謝於台階。第切感銘。益傾禱頌。

謝任秘監見訪啓

車騎雍容甚都。忽枉相如之顧。庭宇蕪穢不掃。頗慙仲舉之居。恭惟學士閣下。博大真儒。寬厚長者。以貴而能下之志。訪貧也非病之身。騶馭方臨。里閭聳觀。所與來者。無非可人可人。何樂如之。是謂有客有客。但俎饌無六肴之美。樽醪

非九醞之香。賓重主輕。酒薄顏厚。虛度貴人之過。徒爲後日之嗟。病莫造門。書不悉意。

上座主金相國謝衣鉢啓

良鏡

金 坵

某伏承恩門相國。嘗登科爲第二人。至踐相位。主闢禮闈。僕以不才。亦及門下第二名。蒙舉和范二魯公衣鉢故事。言及之者。三年後目無全牛。妙入庖丁之手下。百步間相有孕馬。價增伯樂之眼前。例蒙恩幸者。猶切粉糜。况踐世科者。曷勝銘珮。故將淺述。仰謝洪私。竊聞周闢西雍。始膳羞於國老。漢開東觀。初蒲帛於儒生。枝蕃晉魏之間。葉暢隋唐之始。此皆路九流而聘士。門六藝而招賢。或程之以四科。或策之以三道。鄉曲淘沙於俊造。歌鹿鳴以送都。公卿推轂於賢良。薦鶚表而授職。加帖試文。兮權輿於思立。糊名考實。兮粉繪於載言。本不。限於仄微。又不拘於耆幼。是故路溫舒爲獄吏。俄舉孝廉之科。匡稚圭起農夫。卒升文學之選。抽身於傭賃者。有如闕澤。拔迹於芻牧者。亦若孫弘。兩孩登德。祥榜中。五老出鄭熏門下。緊得人於斯爲盛。蓋崇文自古而然。咸業儒以馳名。競聲譽而定價。華歆頭。邴腰。管尾。曾聞魏友之龍飛。孔子首淵翼。騫翎。亦見唐賢之鳳翥。馮道明閱雍陶於詩集。孔文舉謁元禮以世交。攬工部袂。拍翰林肩。杜荀鶴遇知於顧氏。識賈誼面把相如手。裴耀卿被薦於張公。然以心論固非貌取。豪傑雖殊。兮豈仰鼻而四手八足。闒茸相混。兮皆戴頭以九竅一身。下里